

Tumpu sektor pertanian, perikanan ketika nilai ringgit lemah

Oleh [Dr Mohamad Reeduan Mustapha](#) - Januari 29, 2024 @ 10:13am, bhrencana@bh.com.my



Foto hiasan. - Bernama

Kukuhnya nilai mata wang aspek penting menentukan kestabilan ekonomi negara. Kita sedia maklum kebaikan dan keburukan disebabkan turun naik nilai mata wang. Namun Malaysia sebagai negara terus membangun perlu menjaga nilai ringgit agar dapat memberikan manfaat maksimum kepada rakyat dan pelabur.

Secara umum, kemampuan sesebuah kerajaan mempengaruhi nilai mata wang membabitkan pelbagai faktor tempatan dan global. Keputusan dan dasar diambil bank pusat, perancangan fiskal, kestabilan politik dan keadaan ekonomi global memberi kesan terhadap nilai mata wang.

Di Malaysia, tiga faktor utama memberikan impak kepada nilai ringgit ialah kestabilan politik, harga minyak mentah global dan kadar faedah ditetapkan Bank Negara Malaysia (BNM) serta kadar faedah Amerika Syarikat (AS) tinggi memberikan implikasi secara langsung terhadap nilai ringgit dan dolar AS.

Oleh itu, kerajaan perlu menjalankan dasar ekonomi bijak, mengambil langkah meningkatkan daya saing ekonomi, memastikan kestabilan dalam politik dan kewangan bagi mengukuhkan kedudukan nilai mata wang.

Tidak dapat dinafikan nilai ringgit menjunam kini boleh membawa beberapa kebaikan kepada negara, terutama dalam sektor ekonomi dan perdagangan. Dengan nilai ringgit rendah, produk dan perkhidmatan tempatan menjadi lebih murah apabila dieksport, secara tidak langsung memberikan kelebihan daya saing kepada eksport negara.

Peningkatan eksport meningkatkan pendapatan negara melalui cukai eksport dan hasil berkaitan. Selain itu, sektor pelancongan mengalami pertumbuhan kerana nilai ringgit rendah menjadikan Malaysia destinasi pelancongan lebih berpatutan bagi pelancong asing.

Namun, di sebalik kebaikan itu, penurunan nilai ringgit pada antara paras terendah sejak 1998 membawa cabaran besar kepada ekonomi negara. Peningkatan inflasi adalah antara isu utama, dengan harga barang dan perkhidmatan tempatan serta import meningkat, sekali gus memberi tekanan kepada kos hidup rakyat.

Selain itu, kos import lebih tinggi meningkatkan beban hutang negara, terutama hutang luar negara dalam mata wang dolar AS. Keadaan ini mencetuskan ketidakpastian ekonomi dan menjejaskan keyakinan pelabur serta menghalang pertumbuhan ekonomi jangka panjang.

Dalam menghadapi nilai ringgit merosot, perlu ada pendekatan seimbang untuk memastikan kestabilan ekonomi dan kesejahteraan rakyat. Langkah bijak dan berhati-hati perlu diambil pihak berkuasa untuk mengelak risiko dan merancang strategi sesuai dalam menghadapi cabaran ekonomi mungkin timbul.

Penurunan nilai ringgit ini juga dapat mencipta ketidakpastian dalam bekalan makanan negara. Ini boleh mengakibatkan fluktuasi atau turun naik dalam harga bahan makanan dan kebolehcapaian kepada pelbagai jenis makanan, yang boleh memberi kesan kepada rakyat.

Penurunan nilai ringgit berterusan memberikan impak langsung terhadap kos bahan makanan dan kestabilan bekalan makanan di pasaran. Kebanyakan bahan makanan diimport seperti jagung, soya, gandum, komoditi asas makanan ternakan dan barang kering lain, mungkin mengalami kenaikan harga kerana penurunan nilai mata wang akan menyebabkan nilai tukaran lebih rendah.

Kenaikan ini memberi tekanan terhadap belanja harian isi rumah, terutama B40 dan M40. Kenaikan kos import juga boleh memberi kesan kepada industri pertanian tempatan.

Sementara beberapa produk tempatan mungkin menjadi lebih kompetitif, peningkatan harga input seperti baja dan racun perosak diimport boleh meningkatkan kos pengeluaran petani, sekali gus mungkin memberi kesan kepada harga produk makanan tempatan. Ini akan meningkatkan kos pengeluaran, akhirnya menaikkan harga jualan produk makanan.

Hakikatnya, Malaysia kaya dengan sumber asli termasuk tanah subur untuk pertanian seharusnya memberikan fokus terhadap sumber dalaman dan pengurangan kebergantungan terhadap import luar negara adalah pendekatan strategik dapat memperkukuhkan ekonomi negara.

Penting bagi kerajaan untuk memacu pembangunan industri tempatan dengan menyediakan sokongan dan insentif kepada perusahaan dalam meningkatkan daya saing serta menghasilkan produk sebelumnya perlu diimport.

Selain itu, pelaburan dalam penyelidikan dan pembangunan dapat memacu inovasi, mencipta produk dan perkhidmatan baharu yang mampu memenuhi keperluan dalaman serta berpotensi untuk dieksport.

Langkah lain termasuk penekanan pada pengembangan sumber manusia melalui peningkatan Pendidikan dan Latihan Teknikal Serta Vokasional (TVET) menjadikan tenaga kerja lebih berkemahiran.

Peningkatan pengeluaran makanan tempatan dengan menyokong industri pertanian dan perikanan juga pendekatan berkesan dalam mengurangkan kebergantungan kepada import makanan.

Dengan meningkatkan pengeluaran makanan tempatan, negara dapat meningkatkan bekalan makanan tempatan. Ini membantu mengurangkan risiko ketidakstabilan bekalan makanan dan kebergantungan terhadap pasaran global yang mungkin terjejas oleh faktor seperti perubahan iklim, ketidakstabilan ekonomi global atau krisis kesihatan.

Peningkatan kesedaran pengguna terhadap produk tempatan, pelaburan dalam infrastruktur tempatan dan pembangunan sektor ekonomi digital juga turut membantu mencapai matlamat pengurangan kebergantungan kepada import.

Sokongan kepada industri pertanian dan perikanan memungkinan negara untuk lebih banyak mempelbagaikan jenis produk makanan dihasilkan secara tempatan. Ini bukan sahaja memberi pelbagai pilihan kepada pengguna, bahkan mencipta peluang ekonomi lebih luas dan meningkatkan daya saing industri makanan tempatan di pasaran antarabangsa.

Dengan meningkatkan pengeluaran makanan tempatan, kebergantungan kepada import makanan boleh dikurangkan. Ini membantu negara mengurangkan tekanan terhadap mata wang untuk membayar import makanan.

Sokongan kepada industri pertanian dan perikanan tidak hanya memberi kesan positif kepada kestabilan bekalan makanan, bahkan meningkatkan pendapatan petani dan nelayan tempatan, sekali gus membantu dalam meningkatkan taraf hidup komuniti pertanian dan nelayan serta merangsang pertumbuhan ekonomi di kawasan berkenaan.

Industri pertanian memerlukan baja sebagai input penting dalam proses pengeluaran. Dengan meningkatkan industri pertanian dan perikanan, permintaan terhadap baja juga dapat meningkat.

Ini memberi peluang untuk mengembangkan dan meningkatkan keupayaan industri baja tempatan, yang pada gilirannya dapat menyokong pertumbuhan ekonomi secara menyeluruh.

Peningkatan pengeluaran makanan tempatan juga boleh meningkatkan tahap keselamatan makanan dan kualiti produk. Kawalan lebih baik ke atas proses pengeluaran dan pemantauan kualiti dapat diterapkan, memberikan keyakinan kepada pengguna mengenai sumber makanan tempatan.

Peningkatan pengeluaran makanan tempatan dengan menyokong industri pertanian dan perikanan tidak hanya menyumbang kepada pertumbuhan ekonomi pada masa kini tetapi juga membina dasar untuk pembangunan mampan.

Ini merangkumi pemeliharaan sumber daya alam, pengurangan impak alam sekitar dan pemeliharaan kepelbagaian biologi. Strategi ini penting bagi menggerakkan inisiatif kerajaan ke arah mencapai ekonomi Madani.

Penulis adalah Pensyarah Kanan, Fakulti Pengurusan Industri, Universiti Malaysia Pahang Al-Sultan Abdullah (UMPSA)